



## Služba za reviziju finansijskog poslovanja

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI  
GODIŠNJEG FINANSIJSKOG IZVJEŠTAJA ZA 2008. GODINU  
I POSTIZBORNOG FINANSIJSKOG IZVJEŠTAJA – LOKALNI IZBORI 2008.  
**STRANKE DEMOKRATSKE AKCIJE**

Broj: 03-07-6-1542/09  
Sarajevo, 20. april 2010. godine

## SADRŽAJ:

MIŠLENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije .....	5
Cilj revizije.....	5
Obim revizije .....	5
4. PRETHODNE REVIZIJE .....	5
5. NALAZI I PREPORUKE .....	6
5.1. NALAZI.....	6
5.2. PREPORUKE.....	10

## **MIŠLJENJE REVIZORA**

Služba za reviziju finansijskog poslovanja u Centralnoj izbornoj komisiji Bosne i Hercegovine (u daljem tekstu: Služba za reviziju) je izvršila reviziju finansijskih izvještaja **Stranke demokratske akcije** i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.  
Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom smo utvrdili da Stranka demokratske akcije u izvještajnom periodu nije postupila u skladu sa odredbama člana 3. stav (2), člana 4. stav (2), člana 6., člana 8. stav (1) i člana 11. stav (1) i stav (3) Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaji ukazuju da je Stranka demokratske akcije u 2008. godini postupala u skladu sa Zakonom o finansiranju političkih stranaka.**

## 1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju finansijskih izvještaja Stranke demokratske akcije i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka demokratske akcije je iskazala ukupne prihode u iznosu od 5.314.523,68 KM, čija struktura je data u sljedećoj tabeli<sup>1</sup>:

Red.br.	Vrsta prihoda	Iznos u KM	Učešće u uk.prih. %
1	Članarina	75.160,71	1,41%
2	Prilozi fizičkih lica	370.638,06	6,97%
3	Prilozi pravnih lica	170.630,54	3,21%
4	Prihodi od imovine	50.222,00	0,94%
5	Prihodi od pr.lica	0,00	0,00%
6	Prihodi od poklona	4.934,45	0,09%
7	Prihodi iz budžeta	4.642.937,92	87,36%
	Ostali prihodi	0,00	
	<b>Ukupni prihodi:</b>	<b>5.314.523,68</b>	<b>100,00%</b>

U godišnjem finansijskom izvještaju politička stranka je iskazala ukupne rashode u iznosu od 5.638.475,69 KM.

## 2. PREDSTAVLJANJE POLITIČKE STRANKE

Naziv političke stranke: Stranka demokratske akcije. Skraćeni naziv stranke je SDA.

Politička stranka je registrovana 13.06.1990. godine kod Kantonalnog suda u Sarajevu pod brojem R-I-7/90.

Sjedište političke stranke je u Sarajevu, ulica Maršala Tita 9A/II.

Za zastupanje stranke u 2008. godini bio je ovlašten Sulejman Tihić, predsjednik stranke. Osoba ovlaštena za podnošenje finansijskih izvještaja za 2008. godinu je Amir Zukić.

<sup>1</sup> Podaci koji su iskazani u tabeli preuzeti su iz godišnjeg finansijskog izvještaja Stranke demokratske akcije za 2008. godinu, u kome je stranka u skladu sa odredbama člana 13. stav (3) Zakona o finansiranju političkih stranaka dobrovoljno otklonila nedostatke i Centralnoj izbornoj komisiji BiH isti dostavila 27.01.2010. godine.

Prema podacima koje je Stranka demokratske akcije navela u godišnjem finansijskom izvještaju za 2008. godinu, organizacionu strukturu stranke čine:

- Centrala stranke,
- 9 kantonalnih odbora,
- 6 regionalnih odbora,
- 118 opštinskih odbora i
- SDA Brčko Distrikt BiH.

### **3. OPIS REVIZIJE**

**Predmet revizije** su godišnji finansijski izvještaj za 2008. godinu i postizborni finansijski izvještaj – Lokalni izbori 2008. godine Stranke demokratske akcije i to sljedećih organizacionih dijelova:

- Centrala SDA,
- Kantonalni odbor SDA Sarajevo,
- Kantonalni odbor SDA Unsko-Sanski kanton i
- Općinski odbora SDA Tuzla.

**Cilj revizije** je da revizoru omogući da izrazi mišljenje o tome da li je Stranka demokratske akcije u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10. Izbornog zakona Bosne i Hercegovine.

**Obim revizije** finansijskih izvještaja Stranke demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na članarine, priloge fizičkih lica, priloge pravnih lica, prihode od imovine, prihode iz budžeta i troškove predizborne kampanje.

### **4. PRETHODNE KONTROLE I REVIZIJE**

U prethodnom periodu izvršeni su revizija godišnjeg finansijskog izvještaja Stranke demokratske akcije za 2004. i 2006. godinu, i pregled godišnjeg finansijskog izvještaja za 2005. i 2007. godinu nakon kojih su izdati izvještaji o reviziji i izvještaji o pregledu sa mišljenjem revizora, nalazima i preporukom revizije da stranka treba postupati u skladu sa odredbama člana 3. stav (1) i (2), člana 5. stav (1), člana 6., člana 8. stav (1) Zakona o finansiranju političkih stranaka i da finansijske izvještaje treba popunjavati u skladu sa odredbama člana 11. stav (3) Zakona o finansiranju političkih stranaka i Pravilnikom o godišnjim finansijskim izvještajima političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2008. godinu, utvrđeno je da politička stranka nije ispoštovala sve preporuke koje su date u izvještajima o pregledu i reviziji finansijskih izvještaja, odnosno i dalje postupa suprotno odredbama: člana 3. stav (2), člana 6., člana 8. stav (1) i člana 11. stav (3) Zakona o finansiranju političkih stranaka.

## 5. NALAZI I PREPORUKE

### 5.1. NALAZI

- a) **Na osnovu obavljene revizije utvrđeno je da Stranka demokratske akcije nije ispoštovala odredbe člana 3. stav (2) Zakona o finansiranju političkih stranaka<sup>2</sup>.**

Prema podacima iz Rješenja o upisu u sudski registar subjekta upisa broj: U/I - 566/00 od 30.05.2000. godine i Izvoda iz sudskog registra pravnog subjekta upisanog u registarskom ulošku broj: 1-3463, utvrđeno je da je Stranka demokratske akcije osnivač i vlasnik „Nezavisne radio televizije Travnik“ d.o.o. sa sjedištem u ulici Bosanska broj 133 u Travniku. Obzirom da se preduzeće u vlasništvu političke stranke može baviti samo djelatnošću vezanom za kulturu ili izdavačkom djelatnošću, djelatnost pravnog subjekta „Nezavisna radio televizija Travnik“ nije u skladu sa odredbama člana 3. stav (2) ovog Zakona.

Dana 02.10.2007. godine Stranka demokratske akcije je donijela Odluku o prenosu vlasničkih prava stranke u „Nezavisnoj radio televiziji Travnik“ d.o.o. Travnik na Općinu Travnik, na osnovu koje je 07.11.2007. godine između ove političke stranke i Općine Travnik, kod notara sačinjen Ugovor o prenosu udjela broj OPU-2167/2007.

Nakon inicijative pokrenute od strane Centralne izborne komisije BiH, prema Regulatornoj agenciji za komunikacije Bosne i Hercegovine da preispita dozvole za rad javnim emiterima čija djelatnost nije u skladu sa odredbama člana 3. stav (2) Zakona o finansiranju političkih stranaka, Regulatorna agencija je poduzela korake kako bi osigurala poštivanje ovog zakona. Regulatorna agencija za komunikacije je Centralnu izbornu komisiju BiH obavijestila 09.07.2009. godine aktom broj 04-29-1847-1/09, u kome navodi da je u toku postupak promjene vlasničke strukture „Nezavisna radio televizija Travnik“ čiji je osnivač Stranka demokratske akcije.

Općinsko vijeće Travnik je Zaključkom broj: 01-1-1-4-472/09 od 16.09.2009. godine zadužilo načelnika Općine Travnik da imenuje stručni tim za izradu Elaborata o prenosu osnivačkih prava i opravdanosti postojanja javne RTV Travnik.

Revizijom godišnjeg finansijskog izvještaja Stranke demokratske akcije za 2008. godinu nije utvrđeno da je ova politička stranka u 2008. godini ostvarila prihod od dobiti navedenog pravnog lica.

- b) **Stranka demokratske akcije je prekršila odredbe člana 4. stav (2) Zakona o finansiranju političkih stranaka.<sup>3</sup>**

Uvidom u dokumentaciju političke stranke, vezanu za nabavku stručnih publikacija i literature, utvrđeno je stranka ne raspolaže računima ispostavljenim od strane svih fizičkih lica od kojih je izvršena nabavka.

Stranka je na osnovu ponude za otkup knjiga od dva autora nabavila i platila knjige u vrijednosti od 11.900,00 KM. Autori knjiga Mehmedalija Hadžić, kome su uplaćena sredstva u iznosu od 6.000,00 KM i publicista Mehmed Karahodžić, kome je uplaćeno je 5.900,00 KM, stranci nisu ispostavili račune u skladu sa odredbama člana 4. stav (2) Zakona o finansiranju političkih stranaka niti bilo koji drugi valjan dokument.

---

<sup>2</sup> Preduzeće u vlasništvu političke stranke može se baviti samo djelatnošću vezanom za kulturu ili izdavačku djelatnost.

<sup>3</sup> Pravno i fizičko lice koje političkoj stranci pruži uslugu ili proda proizvod mora stranci ispostaviti račun

Također, autoru knjige Hazimu Akmadžiću isplaćen je iznos od 3.500,00 KM na osnovu računa koji nije valjan i ne sadrži datum kada je isti ispostavljen.

**c) Revizijom je utvrđeno da Stranka demokratske akcije nije postupila u skladu sa odredbama člana 6. Zakona o finansiranju političkih stranaka.<sup>4</sup>**

U finansijskom izvještaju stranka nije prijavila priloge pravnih lica u ukupnom iznosu od 3.000,00 KM. Stranci demokratske akcije dva pravna lica „BI produkcion“ d.o.o. Bihać i „Zlaya sound & lights“ Sanski Most su pružili usluge tehničkog opremanja predizbornih skupova, svako lice za po četiri predizborna skupa, a usluge su naplatila za organizaciju po tri predizborna skupa.

Pravno lice „BI produkcion“ d.o.o. Bihać je stranci ispostavilo račun broj 00007-09 od 22.09.2008. godine na iznos 4.500,00 KM u kome naglašava da je to cijena za uslugu tehničkog opremanja tri predizborna skupa, dok je usluga za jedan predizborni skup gratis.

Na isti način, uslugu Stranci demokratske akcije je pružilo i pravno lice „Zlaya sound & lights“ Sanski Most, odnosno na računu broj 10/08 od 24.09.2008. godine stranci je fakturisana usluga za tehničko opremanje tri predizborna skupa u ukupnom iznosu od 4.500,00 KM, a usluga za jedan predizborni skup je gratis. Obzirom da cijena usluge, kako je iskazano na računima ispostavljenim stranci, po jednom predizbornom skupu iznosi 1.500,00 KM, stranka je na način što je oslobođena plaćanja tehničke podrške za dva predizborna skupa, ostvarila priloge od dva pravna lica u iznosima po 1.500,00 KM koje nije prijavila u finansijskom izvještaju u skladu sa odredbama člana 6. Zakona o finansiranju političkih stranaka.

**d) Revizijom godišnjeg finansijskog izvještaja utvrđeno je da je Stranka demokratske akcije prekršila odredbe člana 8. stav (1) Zakona o finansiranju političkih stranaka.<sup>5</sup>**

- Centrala Stranke demokratske akcije je po osnovu ugovora o sufinansiranju zapošljavanja pripravnika, od Javne ustanove „Služba za zapošljavanje Kantona Sarajevo“ primila sredstva u iznosu 3.599,10 KM što je suprotno odredbama člana 8. stav (1) ovog zakona.
- Stranka demokratske akcije, odnosno njena dvadeset četiri (24) organizaciona dijela, bez naknade su koristila poslovne prostorije opštinskih organa uprave, što nije u skladu sa odredbama člana 8. stav (1) Zakona o finansiranju političkih stranaka.

Općinski odbor SDA Živinice je koristio prostor površine 30 m<sup>2</sup> u vlasništvu Općine Živinice. Kako prema odluci OV Općine Živinice<sup>6</sup> najmanja cijena zakupa na području ove općine iznosi 3,00 KM po m<sup>2</sup>, stranka je korištenjem prostora bez naknade ostvarila zabranjen prilog u iznosu od 1.080,00 KM.

---

<sup>4</sup> Ako ukupan iznos priloga jednog pravnog ili fizičkog lica premašuje 100 KM, ta uplata mora da se unese u finansijski izvještaj u skladu sa članom 11. Zakona o finansiranju političkih stranaka.

<sup>5</sup> Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

<sup>6</sup> Akt Općine Živinice broj 02-025-2324 od 30.03.2009. godine koji je dostavljen Centralnoj izbornoj komisiji BiH

Općinski odbor SDA Vareš je koristio prostor površine 20 m<sup>2</sup> u vlasništvu Općine Vareš, po cijeni 40,00 KM mjesečno uvećanoj za porez na dodatnu vrijednost. Obzirom da stranka nije plaćala prostor, ostvarila zabranjen prilog u iznosu od 561,60 KM.

Općinski odbor SDA Ilijaš bez naknade je koristio prostor površine 37,96 m<sup>2</sup> u vlasništvu Općine Ilijaš. Obzirom da u skladu sa Odlukom o načinu i visini plaćanja zakupnine poslovnih prostora na području općine Ilijaš ("Službene novine Kantona Sarajevo", broj 2/00) najniži iznos mjesečne zakupnine na području ove opštine iznosi 8,00 KM, stranka je ostvarila prilog u iznosu od 3.644,00 KM.

Općina Ilidža je Odlukom o dodjeli na korištenje bez naknade poslovnih prostora Općine Ilidža broj: 01-02-339/08-08 od 19.02.2008. godine, Općinskom odboru SDA Ilidža dodijelila poslovni prostor površine 76 m<sup>2</sup>. U skladu sa Odlukom o općim, jedinstvenim kriterijima dodjele u zakup poslovnih zgrada i prostorija kojima pravo raspolaganja ima Općina Ilidža ("Službene novine Kantona Sarajevo", broj 24/97), visina zakupnine za I zonu iznosi 12,00 KM po m<sup>2</sup>, što je takođe potvrdio i pomoćnik općinskog načelnika za finansije Općine Ilidža, aktom broj 06-14-16569/09-1 od 25.09.2009. godine, koji je dostavljen Centralnoj izbornoj komisiji BiH. Neplaćanjem zakupnine, Općinski odbor SDA Ilidža je ostvario prilog od 10.944,00 KM.

Općina Novo Sarajevo je na osnovu Odluke o dodjeli u zakup poslovnih prostora na kojima pravo raspolaganja ima Općina Novo Sarajevo ("Službene novine Kantona Sarajevo", broj 29/07), Općinskom odboru SDA Novo Sarajevo dodijelila bez naknade poslovni prostor površine 81,40 m<sup>2</sup>. Pomoćnik načelnika ove općine je u aktu broj: 03-23-493/09 od 26.03.2009. godine koji je dostavljen na zahtjev Centralne izborne komisije BiH, naveo da bi u skladu sa odredbama člana 6. prethodno navedene odluke, za političke stranke cijena zakupnine iznosila 5,00 KM po m<sup>2</sup>, u slučaju da iste nisu oslobođene od plaćanja. Oslobođanjem od plaćanja zakupnine, Stranka demokratske akcije je ostvarila prilog od 4.884,00 KM.

Općina Jablanica je Općinskom odboru SDA Jablanica bez naknade za korištenje dodijelila poslovni prostor površine 27 m<sup>2</sup>. Na osnovu odluke o prodaji i davanju u zakup poslovnih prostorija („Službeni glasnik Općine Jablanica”, broj 02/06), najniži iznos zakupnine u I zoni ove općine iznosi 8,00 KM po m<sup>2</sup>. Na bazi navedene odluke, utvrđeno je da je Stranka demokratske akcije usljed neplaćanja zakupnine ostvarila prilog od 2.592,00 KM.

Pored navedenih, poslovne prostore bez naknade su koristili i opštinski odbori Stranke demokratske akcije: Novi grad Sarajevo, Stari grad Sarajevo, Hadžići, Tuzla, Čelić, Cazin, Velika Kladuša, Zavidovići, Breza, Fojnica, Donji Vakuf, Jajce, Konjic, Orašje, Teslić, Sanski Most, Bosanska Krupa i Gradski odbor Mostar.

Općinski odbor SDA Centar Sarajevo je na osnovu Ugovora o zakupu poslovnih prostorija, zaključenim 31.03.2008. godine sa Općinom Centar Sarajevo, koristio poslovni prostor površine 105 m<sup>2</sup>, po cijeni koja je ugovorena u iznosu od 1,00 KM po m<sup>2</sup>. Prema Odluci o dodjeli u zakup poslovnih zgrada i prostorija Općine Centar Sarajevo ("Službene novine Kantona Sarajevo", broj 23/04 i 17/06), najniža cijena zakupnine u I zoni Općine Centar iznosi 15,00 KM po m<sup>2</sup>. Korištenjem poslovnog prostora u periodu od aprila do decembra 2008. godine po cijeni koja je ispod cijene utvrđene navedenom odlukom, Stranka demokratske akcije je ostvarila prilog Općine Centara u iznosu od 13.230,00 KM.



Općinski odbor SDA Novi Travnik je bez naknade koristio prostor JU Obdanište Rijad Dizdarević.

**e) Stranka demokratske akcije nije ispoštovala odredbe člana 11. stav (1) i stav (3) Zakona o finansiranju političkih stranaka<sup>7</sup>.**

- Stranka u finansijskom izvještaju nije iskazala troškove zakupnine za poslovni prostor koji je koristila Centrala SDA, niti je iskazala obaveze prema Službi za zajedničke poslove organa i tijela Federacije Bosne i Hercegovine. Na zahtjev Centralne izborne komisije BiH, Služba za zajedničke poslove organa i tijela Federacije Bosne i Hercegovine je aktom broj 01-23-591/09 od 04.03.2009. godine, dostavila podatke o zakupnini Stranke demokratske akcije za 2008. godinu u iznosu od 16.400,00 KM i neizmirenim obavezama stranke u istom iznosu na dan 31.12.2008. godine.
- U finansijskom izvještaju, niti u poslovnim knjigama Kantonalnog odbora SDA Sarajevo nisu iskazani troškovi zakupa u skladu sa odredbama iz Ugovora o zakupu broj: 01-05-12-1756/07 od 22.11.2007. godine zaključenog između Općine Stari grad i KO SDA Sarajevo. Prema cijeni iz Ugovora, zakupnina za poslovni prostor koji je u 2008. godini koristio ovaj organizacioni dio stranke iznosi 52.918,80 KM, a stranka je u finansijskom izvještaju iskazala troškove po ovom osnovu u iznosu od 18.902,68 KM.
- Revizijom finansijskog izvještaja i poslovnih knjiga utvrđeno je da je pravno lice Uslužna zadruga „Peskar“ d.o.o. Sarajevo, Stranci demokratske akcije svaki mjesec ispostavljalo račun za izvršene pomoćne poslove, pozivajući se na uputu za rad i ugovor o obavljanju privremenih i povremenih poslova. U toku 2008. godine ovo pravno lice je stranci ispostavilo trinaest (13) računa u pojedinačnim iznosima od 4.194,38 KM do 4.529,93 KM, što ukupno u 2008. godini iznosi 57.321,36 KM. Revizijom je utvrđeno da je stranka platila sve račune koje je ispostavilo navedeno pravno lice.<sup>8</sup>  
U poslovnim knjigama, a takođe i na obrascu 4-1 godišnjeg izvještaja (režijsko-administrativni troškovi) navedeni iznos je evidentiran kao trošak ostalih usluga. Stranka je u skladu sa članom 11. stav (1) Zakona o finansiranju političkih stranaka i članom 21. Pravilnika o godišnjim finansijskim izvještajima bila obavezna izvršiti klasifikaciju nastalih troškova po osnovu računa Uslužne zadruge „Peskar“.
- U godišnjem finansijskom izvještaju Stranka demokratske akcije nije iskazala obavezu prema pravnom licu „Interauto“ d.o.o. Tuzla u iznosu od 8.306,94 KM, čime je prekršila odredbe člana 23. Pravilnika o godišnjim finansijskim izvještajima političkih stranaka. Stranka je 15.11.2006. godine od navedenog pravnog lica kupila putničko vozilo po cijeni od 16.000,00 KM, uz obavezu da odmah plati dio računa u iznosu od 6.000,00 KM, a ostatak duga u dvadeset (20) mjesečnih rata. Na dan 31.12.2008. godine stranci je ostao dug u ukupnom iznosu od 8.306,94 KM, koji stranka nije iskazala u finansijskom izvještaju.

<sup>7</sup> U skladu sa odredbama člana 11. stav (1) Zakona o finansiranju političkih stranaka, stranka je obavezna voditi evidencije o svojim prihodima i rashodima, a u skladu sa odredbama člana 11. stav (3) istog zakona, stranka je obavezna podnositi finansijski izvještaj u formi koju odobri Centralna izborna komisija BiH. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06)

<sup>8</sup> Prema podacima iz Rješenja Kantonalnog suda u Sarajevu broj: UF/P-40/05 od 19.01.2005. godine, pravnom licu Uslužna zadruga „Peskar“ Sarajevo, Ul. Halilovići bb. Sarajevo, upisanom Rješenjem broj UF/I-4422/00 u registarskom ulošku 3-27, zbog nepodnošenja prijave za upis u sudski registar za usklađivanje podataka prema članu 90. Općeg zakona o zadrugama, utvrđen je prestanak rada.

Također, stranka u finansijskom izvještaju nije iskazala obaveze po osnovu pozajmice od Fondacije za stipendiranje posebno nadarenih čenika „Fonus“ Sarajevo u iznosu od 15.000,00 KM.

## **Troškovi predizborne kampanje**

Stranka demokratske akcije je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 990.825,27 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM<sup>9</sup> po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Stranka demokratske akcije je u svrhu izborne kampanje mogla potrošiti 1.213.665,60 KM.

## **5.2. PREPORUKE**

*Preporučuje se Stranci demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da postupa u skladu sa odredbama člana 3. stav (2) Zakona o finansiranju političkih stranaka, odnosno da se oslobodi vlasništva nad pravnim licem čija djelatnost nije vezana za izdavaštvo ili kulturu;*
- *da obezbijedi račune za sve primljene robe, uključujući knjige i publikacije, kao i usluge koje su pružene stranci;*
- *da u finansijskom izvještaju, u skladu sa članom 6. ovog zakona, prijavljuje sve priloge veće od 100,00 KM;*
- *da se ne finansira iz izvora koji su zabranjeni političkim strankama,*
- *da u skladu sa odredbama člana 11. stav (1) Zakona o finansiranju političkih stranaka uspostavi potpune evidencije po svim vrstama troškova i*
- *da u finansijskim izvještajima koje dostavlja Centralnoj izbornoj komisiji BiH u skladu sa članom 11. stav (3) Zakona o finansiranju političkih stranaka i Pravilnikom o godišnjim finansijskim izvještajima političkih stranaka, iskazuje sve obaveze političke stranke.*

---

<sup>9</sup> Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

## **KOMENTAR**

Stranka demokratske akcije se aktom broj: 06-021-57/10 od 09.04.2010. godine očitovala na Preliminarni izvještaj o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008. godine, odnosno, kako to stranka navodi, „dala odgovor na naše konstatacije“. Stranka uz očitovanje nije dostavila dodatne dokaze koji bi uticali na nalaze revizije navedene u preliminarnom izvještaju.

Zahvaljujemo se osoblju Stranke demokratske akcije na dobroj i korektnoj saradnji tokom obavljanja revizije finansijskih izvještaja.

Mr. Hasida Gušić, Šef Službe za reviziju, revizor

Veliborka Kravljača, pomoćnik revizora